



სახელმწიფო შესყიდვების
სააგენტოს თავმჯდომარის
გ ა ნ კ ა რ გ უ ლ ე ბ ა



KA080183807256019

№ 1213

04 / მარტი / 2019 წ.

შპს „გია კონსტრაქშენის“ გაფრთხილების შესახებ

შემსყიდველი ორგანიზაცია: საქართველოს რეგიონული განვითარებისა და ინფრასტრუქტურის სამინისტროს გამგებლობაში არსებული სახელმწიფო საქვეუწყებო დაწესებულება – საქართველოს საავტომობილო გზების დეპარტამენტი;

ტენდერის ნომერი: NAT180001812;

შესყიდვის ობიექტი: 45200000 – მთლიანი ან ნაწილობრივი სამშენებლო სამუშაოები და სამოქალაქო მშენებლობის სამუშაოები;

მიმწოდებელი: შპს „გია კონსტრაქშენ“ (ს/ნ: 400104409);

წერილობითი შეტყობინების საფუძველი: სახელმწიფო შესყიდვის შესახებ ხელშეკრულებით ნაკისრი ვალდებულებების არაჯეროვანი შესრულება.

აღწერილობითი ნაწილი

1. ადმინისტრაციული წარმოების დაწყება

1.1. სახელმწიფო შესყიდვების სააგენტოში 2019 წლის 4 იანვარს წარმოდგენილ იქნა საქართველოს რეგიონული განვითარებისა და ინფრასტრუქტურის სამინისტროს გამგებლობაში არსებული სახელმწიფო საქვეუწყებო დაწესებულების – საქართველოს საავტომობილო გზების დეპარტამენტის 2019 წლის 4 იანვრის №2-07/64 წერილობითი შეტყობინება (რეგისტრაციის №83), რომლითაც სააგენტოს ეცნობა შპს „გია კონსტრაქშენის“ (ს/ნ: 400104409) მიერ NAT180001812 ელექტრონული ტენდერის საშუალებით დადებული 2018 წლის 29 მარტის №ე.ტ.37-18 სახელმწიფო შესყიდვის შესახებ ხელშეკრულებით ნაკისრი ვალდებულებების არაჯეროვანი შესრულების თაობაზე.

1.2. სააგენტომ შპს „გია კონსტრაქშენს“, სახელმწიფო შესყიდვების ერთიან ელექტრონულ სისტემაში მის პროფილში მითითებული ელექტრონული ფოსტის მისამართის giazaza@live.com მეშვეობით, 2019 წლის 9 იანვრის № 31 წერილით აცნობა სააგენტოში შემსყიდველი ორგანიზაციის წერილობითი შეტყობინების წარმოდგენის თაობაზე და, სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-5 მუხლის მე-5 პუნქტის შესაბამისად, სთხოვა ხსენებულ საქმეზე წერილობითი განმარტების წარმოდგენა. მიმწოდებელს განმარტება არ წარმოუდგენია.

2. შემსყიდველი ორგანიზაციის პოზიცია

შემსყიდველი ორგანიზაციის წერილობითი შეტყობინების თანახმად, მიმწოდებელს, 2018 წლის 29 მარტის № ე.ტ.37-18 სახელმწიფო შესყიდვის შესახებ ხელშეკრულების საფუძველზე, ხელშეკრულების გაფორმებიდან 2018 წლის 20 დეკემბრის ჩათვლით, უნდა შეესრულებინა საავტომობილო გზის შეკეთების სამუშაოები. ხელშეკრულების ღირებულებად განისაზღვრა 292 908,42 ლარი, ხოლო მოქმედების ვადად – 2019 წლის 24 იანვარი. მიმწოდებელმა არაჯეროვნად შეასრულა ხელშეკრულებით ნაკისრი ვალდებულებები, რის გამოც, შემსყიდველმა ორგანიზაციამ 2018 წლის 31 დეკემბრის №2-07/15355 წერილით ცალმხრივად შეწყვიტა მხარეთა შორის გაფორმებული 2018 წლის 29 მარტის № ე.ტ.37-18 სახელმწიფო

შესყიდვის შესახებ ხელშეკრულება და შპს „გია კონსტრაქშენს“ დააკისრა პირგასამტეხლო 2 929,08 ლარის ოდენობით.

3. მიმწოდებლის პოზიცია

მიმწოდებელს ადმინისტრაციული წარმოების ფარგლებში განმარტება არ წარმოუდგენია.

4. სააგენტოს მიერ დადგენილი გარემოებები

4.1. 2018 წლის 2 თებერვალს საქართველოს რეგიონული განვითარებისა და ინფრასტრუქტურის სამინისტროს გამგებლობაში არსებულმა სახელმწიფო საქვეყნებო დანესებულებამ – საქართველოს საავტომობილო გზების დეპარტამენტმა გამოაცხადა NAT180001812 ელექტრონული ტენდერი გზის შეკეთების სამუშაოების (CPV45233142) შესყიდვის მიზნით.

4.2. სატენდერო კომისიის 2018 წლის 9 მარტის №3 სხდომის ოქმით შპს „გია კონსტრაქშენს“ (ს/ნ: 400104409) გამოვლინდა გამარჯვებულად, ხოლო 2018 წლის 19 მარტის № 4 სხდომის ოქმით იგი მიწვეულ იქნა სახელმწიფო შესყიდვის შესახებ ხელშეკრულების გასაფორმებლად.

4.3. 2018 წლის 29 მარტს მხარეთა შორის გაფორმდა № ე.ტ.37-18 სახელმწიფო შესყიდვის შესახებ ხელშეკრულება, რომლის საფუძველზეც, მიმწოდებელს, ხელშეკრულების გაფორმებიდან 2018 წლის 29 ივლისის ჩათვლით, უნდა შეესრულებინა საავტომობილო გზის შეკეთების სამუშაოები. ხელშეკრულების ღირებულებად განისაზღვრა 297 777,69 ლარი, ხოლო მოქმედების ვადად – 2018 წლის 2 სექტემბერი.

4.4. მხარეთა შორის გაფორმებული 2018 წლის 1 აგვისტოს შეთანხმებით, ხელშეკრულების ღირებულება შემცირდა 292 908,42 ლარამდე.

4.5. მხარეთა შორის გაფორმებული 2018 წლის 1 აგვისტოს, 9 აგვისტოს, 14 სექტემბრის, 10 ოქტომბრის, 17 ოქტომბრისა და 16 ნოემბრის შეთანხმებებით, სამუშაოების შესრულების ვადა, საბოლოოდ, გაიზარდა 2018 წლის 20 დეკემბრის ჩათვლით, ხოლო ხელშეკრულების მოქმედების ვადა – 2019 წლის 24 იანვრის ჩათვლით.

4.6. შემსყიდველი ორგანიზაციის 2018 წლის 18 სექტემბრის № 2-07/11025 და 22 ოქტომბრის № 2-07/12451 წერილებიდან ირკვევა, რომ მიმწოდებელი არღვევდა სამუშაოების შესრულების ვადას.

4.7. მიმწოდებელმა შეასრულა 246 138,63 ლარის ღირებულების სამუშაოები (სრული მოცულობის 84%), რაც დასტურდება მხარეთა შორის გაფორმებული სამუშაოების შესრულების მიღების №5 აქტით.

4.8. მიმწოდებელმა არაჯეროვნად შეასრულა ხელშეკრულებით ნაკისრი ვალდებულებები, რის გამოც, შემსყიდველმა ორგანიზაციამ 2018 წლის 31 დეკემბრის № 2-07/15355 წერილით ცალმხრივად შეწყვიტა მხარეთა შორის გაფორმებული 2018 წლის 29 მარტის № ე.ტ.37-18 სახელმწიფო შესყიდვის შესახებ ხელშეკრულება და შპს „გია კონსტრაქშენს“ დააკისრა პირგასამტეხლო 2 929,08 ლარის ოდენობით.

სამოტივაციო ნაწილი

5. შემაჯამებელი დასკვნა

საქმეში არსებული მტკიცებულებებისა და გარემოებების შეფასებისა და ურთიერთშეჯერების საფუძველზე, სააგენტო მიიჩნევს, რომ შპს „გია კონსტრაქშენს“ უნდა მიეცეს გაფრთხილება.

6. გამოყენებული სამართლებრივი აქტები

სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესი და პირობები“.

7. სამართლებრივი შეფასება

7.1. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-3 მუხლის მე-4 პუნქტის „ბ“ ქვეპუნქტის თანახმად, სახელმწიფო შესყიდვის ნებისმიერი საშუალებით განხორციელებისას, გარდა კონსოლიდირებული ტენდერისა, პრეტენდენტის/მიმწოდებლის შავ სიაში დარეგისტრირების საფუძველია, თუ მიმწოდებელმა ვერ შეასრულა ან არაჯეროვნად შეასრულა ხელშეკრულებით ნაკისრი ვალდებულებები. იმავდროულად, აუცილებელია, რომ ხელშეკრულების მოქმედების ვადა იყოს გასული ან ხელშეკრულება ვადაზე ადრე იყოს შეწყვეტილი.

7.2. იმავე წესის მე-7 მუხლის მე-2 პუნქტის შესაბამისად, საქმეში არსებული გარემოების გამოკვლევის, შეფასებისა და ურთიერთშეჯერების შედეგად, სააგენტო ადგენს, არსებობს თუ არა პრეტენდენტის/მიმწოდებლის შავ სიაში დარეგისტრირების საფუძველი. იმ შემთხვევაში, თუ არსებობს ამ მუხლის მე-4 პუნქტით გათვალისწინებული გარემოებები, სააგენტო იღებს გადანყვეტილებას პრეტენდენტის/მიმწოდებლის შავ სიაში დარეგისტრირებაზე უარის თქმის შესახებ, ხოლო იმ შემთხვევაში, თუ არსებობს პრეტენდენტის/მიმწოდებლის შავ სიაში დარეგისტრირების საფუძველი, სააგენტო, ამ მუხლის

შესაბამისად, იღებს გადაწყვეტილებას პრეტენდენტის/მიმწოდებლის გაფრთხილების ან შავ სიაში დარეგისტრირების შესახებ.

7.3. მოცემულ შემთხვევაში, დგინდება, რომ მიმწოდებელმა არაჯეროვნად შეასრულა 2018 წლის 29 მარტის №ე.ტ.37-18 სახელმწიფო შესყიდვის შესახებ ხელშეკრულებით ნაკისრი ვალდებულებები. ამდენად, სახეზეა მიმწოდებლის გაფრთხილების ან შავ სიაში დარეგისტრირების წინაპირობა.

7.4. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-3 პუნქტის შესაბამისად, გაფრთხილების ან შავ სიაში დარეგისტრირების შესახებ გადაწყვეტილების მიღებისას, სააგენტო, საქმისთვის მნიშვნელობის მქონე გარემოებებთან ერთად, დამატებით ითვალისწინებს დარღვევის სიმძიმეს, პრეტენდენტის/მიმწოდებლის მანამდე მიღებული გაფრთხილების თუ შავ სიაში რეგისტრაციის ფაქტ(ებ)ს, მისი სახელმწიფო შესყიდვებში მონაწილეობის აქტივობას.

7.5. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-5 პუნქტის თანახმად, გაფრთხილების შესახებ გადაწყვეტილება მიიღება იმ შემთხვევაში, თუ შემსყიდველი ორგანიზაციის მიერ წარდგენილი წერილობითი შეტყობინება სრულად აკმაყოფილებს ამ წესის მე-3 და მე-4 მუხლებით განსაზღვრულ მოთხოვნებს, მაგრამ პრეტენდენტის/მიმწოდებლის შავ სიაში დარეგისტრირებით დაირღვევა თანაბრობის პრინციპი. გაფრთხილება გამოიყენება ერთხელ და მოქმედებს ერთი წლის განმავლობაში.


7.6. განსახილველ შემთხვევაში, სააგენტო მიიჩნევს, რომ შემსყიდველი ორგანიზაციის წერილობითი შეტყობინება აკმაყოფილებს ზემოაღნიშნული წესის მე-3 და მე-4 მუხლებით განსაზღვრულ მოთხოვნებს. ამასთან, სააგენტო ითვალისწინებს მიმწოდებლის მიერ შესრულებული სამუშაოების ღირებულებას (სრული მოცულობის 84%). ამდენად, სააგენტო მიიჩნევს, რომ, ამ ეტაპზე, შპს „გია კონსტრაქშენის“ შავ სიაში დარეგისტრირებით დაირღვევა თანაბრობის პრინციპი და მიზანშეწონილია მის მიმართ გაფრთხილების გამოყენება.

სარეზოლუციო ნაწილი

სააგენტომ იხელმძღვანელა სახელმწიფო შესყიდვების სააგენტოს თავმჯდომარის 2015 წლის 29 ოქტომბრის №19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-5 პუნქტით და დაადგინა:

1. შპს „გია კონსტრაქშენს“ (ს/ნ: 400104409) 2019 წლის 5 მარტს მიეცეს გაფრთხილება.
2. დაევალოს სახელმწიფო შესყიდვების სააგენტოს ინფორმაციული ტექნოლოგიების დეპარტამენტს სააგენტოს ვებგვერდზე შესაბამისი ჩანაწერის გაკეთება.
3. ეს განკარგულება შეიძლება გასაჩივრდეს მისი ოფიციალური გაცნობის დღიდან ერთი თვის ვადაში, თბილისის საქალაქო სასამართლოს ადმინისტრაციულ საქმეთა კოლეგიაში (ქ. თბილისი, დავით აღმაშენებლის ხეივანი, მე-12 კმ, №6), კანონმდებლობით დადგენილი წესით.

თავმჯდომარე



ლევან რაზმაძე